



FN-ip inuit innarluutillit pisinnaatitaaffii pillugit aalajangersagaanut Nunatta malitsitsinissaa qulakkeerniarlugu nuna tamakkerlugu iliuusissatut periusissiamik kingusinnerpaamik UPA 2020-mi saqqummiunneqartussamik Naalakkersuisut suliaqarnissaat pillugu Inatsisartut aalajangiiffgisasattut siunnersuut.

(Inuit Ataqatigiit Inatsisartuni ilaasortaataat)
(Siullermeerneqarnera)

Demokraatini nuannaarutigaarput innarluutillit pillugit immikkoortumi inatsitigut pitsanngorsaasoqalermat aamma soqutigisaqaqatigiippassuit inuit innarluutillit ikorfartorneqarnissaat pillugit inatsit tapersersormassuk.

Innarluutillilli illersuisuat ataatsimiinnermi ersarissumik ima oqarpoq" imaanut asseq paasissallugu ataasiuvoq, umiarsuulli aqunnissaa allaavoq". Allatut oqaatigalugu kommunini sullissisut inatsit nutaaq ilinniarlugulu paasiniartussaavaat sulinerminnilu tunngavigalugu, allaavorli kommuninut piumasaqaatitta malinneqarnissaat innarluutillit misigilersillugit pisinnaatitaaffeqarnerulersimasut.

Saaffiginnissutit Innarluutillit illersuisuanit tiguneqartartut imarigajuppaat kommunimi sullissinermik naammagittaalliutit. Taamaattumik inatsimmi nutaami qularnaarneqassappat innuttaasut ataasiakkaat periarfissaasa pitsanngorsarnissaat pingaaruteqarpoq sullissisalersussat inatsimmi aalajangersakkat tunngavigalugit sulisinnaangornissaat. Taamaattumik aamma pingaarluinnaqqissaarpoq kommunimi politikerit, aqutsisut sullissisullu pikkorissarnissaannut pilersaarutit suliarilluarsimanissaat, ajornanginneruleqqullugu inuit innarluutillit ikorfartorneqarnissaat pillugu inatsisip malinneqarnissaa, kiffartuussinerup pitsaanerulernissaa inatsisiliuussinnaanginnatsigu.

Innarluutillit pillugit inatsisip atortussangortinnerata kingorna kommunit suliaannk nalilersuisinnaanissaq Demokraatini isumarput naapertorlugu suliarissallugu pissanganarsinnaavoq.

Kommunit suliasartik naammassisinnaavaat? Inatsit siunertarput naapertorlugu atuuppa?
Nalilersuisariaqarpugut imaluunniit allaanerusumik iliuuseqartariaqarpugut? Inatsisip atuutilernerata kingorna sullissineq pillugu naammagittaalliutit amerlippat? il.il.

Qanorsuaq inatsisiliorsinnaavugut kisianni aamma nalilersorsinnaasariaqarparput iluatsitsisimanerluta iluatsitsisimanginnerlutaaluunniit aamma iluatsitsisimangikkutta qanoq allaanerusumik iliortariaqassanerluta nalilersorsinnaasariaqarparput.

Nunatsinni innarluutilinnut qitiusumik sullissiveqarpugut ilinniarsimasat tunngavigalugit ilitsersuisarfiusumik, siunnersuisarfiusumik aamma misissuisarfiusumik, ilinniartitsiviusumik,



pikkorissarfiusumik, oqaloqatiginnittarfiusumik aamma timikkut, tarnikkut, oqaluttarnikkut eqqarsartaatigullu innarluuteqaraanni sungiusarfiusinnaasumik.

Neqeroorutit tamakku sulisunut tunnganerupput taamaattumik Pissassarfiup kommunillu suleqatigiinnerat aamma nukittorsartariaqarparput, ilisimasaqarmata sullissisut sulinermini iluaqutissarsivigisinnaasaannik.

Naalackersuisut isumaqatigaagut oqarmata Kalaallit Nunaatta 2020-mi Naalagaaffiit Peqatigiit inunnut innarluutilinnut komiteani misilitsinneranut atatillugu tulluassasoq inuit innarluutillit atugaat pitsanngorsaniarlugit suliap ingerlaqqinnissaa ilanngunneqartuuppat. Taamaattumik iliusissanut pilersaarummut atatillugu anguniagassanik aalajangersaalinnginnermi pitsaasuusaaq Naalackersuisut allannguutissatut siunnersuutaanut ilaliigutta immikkoortorlu ilaqtariinnermut peqqissutsimullu suliassanngorlugu ingerlateqqillugu siunnersuutip appassaaneerneqannginnerani.